

## COMUNICÂT STAMPE

### ARLEF A FRIULI DOC: DOMAN CONCIERT DI LINO STRAULINO

#### Ogni dì il spazi de Agenzie al sarà viert des 10 aes 21 Des 10 a misdì direte di Radio Onde Furlane

Udin, ai 11 di Setembar 2013 – Si invie doman di sere, joibe ai 12, aes 21.30, la grande musiche furlane in place dai Grans a Udin par cure de ARLeF, Agenzie regionâl pe lenghe furlane: Lino Straulino al scree “Gorai” e il cjantautôr cjargnel al varà dongje tant che ospits il grup dai Jonokognos e l’udinês Stefano Fedele.

Doman, daspò de scree di Friuli Doc aes 17.30, si invie ancje il spazi ARLeF che al vierzarà ogni dì aes 10 e al restarà a disposizion dilunc dute la manifestazion cun materiâl informatîf, gadget e gnovis publicazions - tant che par esempi il dvd de Pimpa par furlan pai fruts – fin sot sere, aes 21.

Simpri scomençant des 10 di buinore fin a misdì, Radio Onde Furlane e larà in onde in direte alì dal spazi ARLeF cun ospits istituzionâi e cun intervencs par cure dai rapresentants dai ents ricognossûts pe tutele e promovion de lenghe furlane e dai consorzis dal agroalimentâr presints tal spazi dal ERSA.

Il conciert di Straulino, un dai massims esponents de Gnove musiche furlane, al introdusarà l’apontament dal dì dopo, vinars ai 13 di Setembar, simpri in place dai Grans, cuant che aes 17.30 e vignarà presentade “Suns, antologjie de gnove musiche furlane”. Moderâts dal diretôr de ARLeF, William Cisilino, a intervignaran il produtôr Valter Colle e i curadôrs dai tescj Luigi Gregoris, Marco Stolfo, Nicola Cossar e Andrea Ioime.

I amants de musiche a podaran vinci la antologjie cjapant part al concurs de ARLeF propit in ocasion di Friuli Doc cu la pussibilitât di vinci 500 copiis de opare: al coventarà dome compilâ la schede che si cjate sul sît <http://www.arlef.it/it/progetti/iniziative/Suns-Antologjie-de-gnove-musichefurlane> o domandâle al stand de Agenzie, votâ l’artist furlan preferît e consegnâ la schede compilade al personâl in place dai Grans.